

四庫全書

子部

欽定四庫全書

子部

翰苑新書續集卷十二

詳校官中書臣葉元符

主事臣祁韻士覆勘

總校官知縣臣楊懋珩

校對官中書臣王 瓚

謄錄貢生臣王 官

欽定四庫全書

翰苑新書續集卷十二

總領類

賀吳總侍

方秋崖

伏審虎節建臺龜符眦揣大小馮之相代豈惟圖盛事
於衣冠東西總之迭為茲用分顧憂於旒辰有美江山
之第一共嘉國士之無雙波神胥舞於鷁舟春氣肇開
於鵠印歌謠載道想續劔常棣之碑香火滿城當對寫

凌煙之像斯民樂只於帝念哉某朋友同倫兄弟異姓
願言思伯訪戴之興勃然豈無他人依劉之志遂矣式
篋鏘瓊之珮晤言浮玉之山追數平生莫踰此喜

賀吳總侍

方秋崖

恭審進班東壁仍鎮南徐吳如大夫者幾人慨其歎矣
楚與足下有舊故維日望之紛然騎竹之兒童賀此憩
棠之父老恭惟抱經濟之具負魁磊之聲使吾君使吾
民舉之三代難為兄難為弟時則兩蘇久騰鐵甕之謠

纔上玉階之奏高論軼軻吾何憚於此哉人言轉移乃
今知其忠耳豈但青氈之復端膺丹宸之思某嘉與縉
紳誦言綸綍邦人迎拜喜郭細侯之再來邊吏謹傳豈
司馬公之未相久矣扼腕少焉論心

賀楊總領

李梅亭

升賢九列總賦兩川無踰老成久望甲寅之報厥有成
命足寬庚癸之憂除目一傳滿口交慶某官資弘且毅
器博而周解十二牛而有餘才固高於一世繫千馬馬

而弗視氣亦蓋於諸公天使之為入蜀之星人以此卜
擒酋之月知彼知己漢中方務於養民擒賊擒王許下
幾為之避地徒緣食乏遂致師還皇欲我公身任此事
爰峻上卿之拜俾專計相之權金掌月升光無不燭玉
關夜閉守或有餘聊寬西顧之憂即聽東歸之命某聳
聞出紵竊喜得輿敢問遲之遲長恐遭羣吠之怪可以
速則速幸即過四牡之驅

賀梁總領

鄭雪巖

奏課餉臺疏榮召節外府輟九卿之班列既壯邊聲中
書幹萬化之本原晉禪國論仰窺睿旨厥有閱墓蓋以
儒者談兵深戒乎嘗試古人料敵必覘其密微方百年
彼運之積衰而四海人心之咸奮武夫抵鳴劔之掌儒
生衝怒髮之冠威可遠加莫不引領而望矣兵難遙度
願借前箸以籌之爭自竭於腹心迄未得其要領淺謀
者既齷齪而不足聽大言者又漫漶而適為誇上既厭
之慨老成之長慮天其或者開景運之中興某官魁閔

卓犖之才冲遠博碩之器雄名籍甚羞崑崙薄蓬萊重
德歸然載華嶽振河海乘傳皇華之隰飛芻細柳之營
自江輸淮以達京師錢流地上聚米為谷以陳形勢敵
在目中凡其鷗張奔突鷙悍之形狼子野心狙詐之狀
與夫斤堠控扼之險要糗糧儲峙之贏虛皆笏畫鞭筭
之餘如燭照數計之熟嚴助奉三年之計最入奏甘泉
柳渾知萬里之戎情宜在吾禁以按歷封陞之成算為
從容帷幄之運籌堂上有奇兵贊廟謨而決廟勝海內

想風采繇宰掾而登宰司某兀坐冷曹聳聆溫詔月明
烏遶未知何枝之可依霜凜鐘鳴竊効同聲之相應

賀淮西趙總帥

洪平齋

恭審疏禁中禁總餉外臺卿月獨升光動九農之扈使
星轉曜歡騰萬竈之屯綸綍一頒薦紳交慶恭惟某官
至剛以直大雅不羣赤手而搏蛟螭其才不可及矣壯
志之騎鴻鵠雖老未嘗衰焉居然出入之具宜投之煩
劇而不亂眷深帝辰名重宗磐屬西非兵端之既開而

東南民力之易竭還定雖勤於鴻雁轉輸莫給於貔貅
張頤可憂束手無策非得當今之劉晏安能追古之鄩
侯上深嘆於才難弄印久矣公不辭於重任披襟當之
晉升九躡之華益聳百城之望游心運解牛之志著鞭
策流馬之功強兵富國之圖小煩供億致主澤民之業
卽罄論思某自嗟久墮於吏塵猶記舊聯於朝績聳聞
除目倍切忻悰千里相望有春樹暮雲之想萬間可托
何震風凌雨之虞

賀黃運使除總領

李梅亭

內躋郎省外總餉臺西賓出幙之十年遂專主席東漕
下車之三月盡總賦輿人歌錫命之蕃上恨用公之晚
某官器資凝遠業履端溫言行夙擇乎中庸名實久孚
於上下頃歲紅巾之變折衝白刃之間數進忠規刈葵
惟恐其放手縱無恩澤徙薪豈下於焦頭共推江夏之
無雙再試潁川之第一維駒維騏維駱暫紆苞栩之飛
如熊如羆如貔孰飽樵蘇之爨帝咨衆望僉曰公宜王

人下視於諸侯有嚴天節郎官上應於列宿肯歷土山
政令先庚而已乎軍民旁午以相賀田里愁恨歎息久
矣周知財貨本末源流尤皆宿講皮不存則毛將安傅
唇既亡則齒得無寒欲兵食兼足之沛然在制閫同心
而已爾既無間秦越之肥瘠何難圖韓范之功名某百
無一能億或屢中項進總領甚稱之語蓋在咨諏周爰
之初茲聆除目之頒豈勝頓足之喜惟榮之歲租無五
千斛而使所月解近七萬緡昨賴管煎抱賣之贏用補

大科帶補之欠近困井遷之後難施箕斂之苛在小郡
官兵既多空腸而大司符移尚理虛額巧但施於有麪
窮莫甚於無錐與物為春望公如歲今夕飲者恩明日
按者法正賴故人觀察急於賦刺史私於民願哀老子

上宋總領

劉後村

峙糧京口隄瞻郎宿之高竊廩邊頭驟出使天之下前
此第勤於恭梓今焉偶迫於及瓜敢飭訥詞僭干嚴分
某官高明而密察峻整而疎通家擅雄詞固已統傳而

行世門多陰德是宜貴顯之有人自垂髫負秀穎之名
未弱冠陳治安之策小却而紆黃綬一鼓而俘綠林幕
辯風生決滯牘於紅蓮之府琴鳴畫靜訪斷碑於黃木
之灣人方望闕而來公又監州而去亦既老其才業矧
茲磨以歲時鷺翻來儀譽出漢廷之右魚符作牧政如
嚴瀨之清值朝更園法之初而吏奉新書之峻方膠膠
擾擾價莫售於國中乃暴暴源源錢獨流於地上蓋有
功之懋賞豈何自以為郎惟六飛駐吳會以來而萬竈

宿徐方之戍雖酒可飲兵可用幾侔西北之精然戈載
戢弓載橐坐竭東南之力自昔難於虜使乃今得此通
儒逆知財貨之低昂洞了簿書之緣絕蓋心平氣定常
龍見而雷聲故事至物來若龜卜而燭照少待柳營之
飽即趨荷禁之清某承學無聞緣恩入仕頭顱如許合
耕負郭之田園身世了然誓守先人之丘墓笑覓官之
聊爾使折獄以何堪戍減兩期路行萬里已難追於塞
馬又幾厄於淵魚飢阻耒陽酒炙誰存於杜老行吟楚

澤衣冠略似於屈原未定之魂來趨官次敢恃粉榆之
故趣趨竿牘之恭所務期會簿書竊自悲其冗賤無乃
隣里鄉黨或少借於聲光

通胡總鄉

周山房

待問廣廷誤蒙題品庀官半水獲奉教條方以書生來
依大比敢謂學校不同有司輒攄欽企之情布見拙陋
之語某官清夷而不撓簡塞而能通雖即之也溫初非
刻意尚行然定而後應未嘗吐剛如柔泛觀人才各擅

器品法士亢於檢局通人失在濶疎豈無偏長不可翕
受乃若器博足以融衆美力厚可以折羣輕方其晦養
於冊府之中以至傑立於紀綱之地文采績深而不輕
銜露是非紛起而獨守正中仍使吾身無暴赫之名欲
俾天下被和平之福此斯世之所罕恐重任之必歸胡
為玉堂鼎鉉之才尚司金穀甲兵之寄有此地位必副
時須願為世道而自強自副師言之歸重某志嚮甚拙
藝業無聞繞舍栽梨浸忘歲月為親捧檄適在併懍不

圖遭逢有此幸會惟士之初進如木之初生非有託於
養成則亦易於感拔尚期保惠獲寡悔尤苟獲逃庠序
之譏庶不負門牆之賜

通王總領

王懼軒

疏恩萬里移餉六師時急轉輸既已實關中之粟茲嚴
守衛又將豐塞下之儲欣傳棨戟之來敢後緘滕之敬
恭惟某官成都石筍東序河圖被天孫雲錦之裳文成
五色植太乙青藜之杖學富羣經身徑上於青雲心皦

如於白日方逆臣之僭叛見烈士之忠誠涅白不緇雖
赴公山之召徻狂以去未夷箕子之明此一息之從違
實三巴之向背倘當時之乏此則今日之維何及觀於
足兵足食之間尤可驗守道守官之際義如當赴馳峻
阪之輕車事不可從屹中流之砥柱維孟子有塞乎天
地之氣所以浩然信汲黯可謂乎社稷之臣其以直耳
夷攷平生之節操已知他日之勲名常操天下之贏貲
特其寄徑均節邦中之財用正爾知津寧候席温即觀

綸召某舊慚白屋嘗共丹梯望諸公臺省之登一何遠
矣知此事江湖之落諒亦慨然敢以貧身累於恩造王
人序諸侯之上孰不歸依同年雖四海之人少希甄異
其惟懇款罔既敷宣

通四川王總領

李梅亭

企郎宿之周天夙瞻景曜望使星於蜀野行挹餘光同
是天涯莫非王事欲抒方寸之悃可無咫尺之書恭惟
某官器度崇欲典型炳蔚江左風流之後代不乏人襄

陽耆舊之家世濟其美恬於再轉翩若一麾日近長安
謂即登於金馬天通蜀道又出護於木牛惟關中餽餉
之功實海內安危之本樵蘇後爨今多宿飽之師弩矢
前驅古有畫行之美行詠勞還之四牡佇觀趣侍於六
飛某起家單平蒙恩優渥立朝已濫况塵六典之卿試
郡猶慚輒冒十連之帥周環四顧冒昧一來惟方國奉
十行之書妄希宣布諒王人序諸侯之上亦願將明

代通吳總卿

方秋崖

伏以遡魁躔於斗北於皇吾道之華分巖邑於江東幸甚使天之近仰榮光之下屬執弱翰之未遑如責以世俗事大之恭當已獲門牆廢禮之罪敢不自訟道其所懷恭惟某官由孟氏之後而得其傳出漢廷之右而奪之氣大對陳天人之槩內之治中國而外之治遠夷此聲揚梁楚之間上不負天子而下不負所學自其裒然子大夫之首固已輩諸名卿相之流方排閭闔呈琅玕之竒乃羞崑崙薄蓬萊而去蓋以有事於邊圉小煩出

總於軍儲士飽而歌勇自百倍敵歸相戒誓毋再來豈
但使錢穀甲兵之問不至廟堂於此見忠信篤敬之士
可行蠻貊王人叙諸侯之上雖曰無以易堯賢者為邦
家之光正恐思不見賈某所歸戴者敢誦言之切以昔
者孔融對李膺之門猶叙先世夫子與老聃之契矧今
事會何幸親逢三千字而日未斜大父嘗窺於竝議九
萬里而風在下吾翁亦並於英遊矐言再世之逢雅有
一日之好則其依嚮詎不竊深愛其人者愛屋上之烏

况復子孫之在觀吾政而觀桑下之雉所恃父兄之知

代回何總領

方秋崖

伏以兩廂東西殆猶虞虢之唇齒一江南北寧分胡越
之町畦翩其飛翰之臨喜甚同舟之濟恭惟某官有六
館舉幡之勇無萬錢下箸之奢早歲邊城意此敵在目
中矣十年總計過吾軍如席上然適當供輸困乏之秋
獨幹財賦盈虛之妙矧時事莫難於邊遽在人情過慮
於國貧謂雲屯萬竈而杖杜無期雖日費千金而樵蘇

後繫掣肘至此痛心奈何故闡外制之將軍徒有強兵
之請彼舟中自為敵國類多足食之爭於帝念哉惟公
試可蓋以天下之財為天下用夫何憂乎兵興如有此
數之出則此數存正不妨於經費已驗之效無競惟人
願佐中興之勲歸相太平之治某四年于役五技其窮
一車以北一車以南安得共班荆之語衆狙皆喜衆狙
皆怒亦每思賦茅之艱屬聞綸綍之誕頌嘉與縉紳而
相賀秦視越人之瘠舉世皆然晉及楚君之餘匪公誰

望有賒言面敢布腹心

代回湖廣趙總領

李梅亭

疇庸外府進位上卿禮樂光華既茂明於調度貨財平
準茲益重於事權除目一頒輿言胥穆某官持心信厚
臨事浚明恭懿篤誠繼高陽之才子切磋磨琢蹈衛國
之武公揚歷彌深聲華甚重茲肅將於使指俾總視於
軍儲曾不淹時已聞奏最爰進四大夫之祿仍幹半天
下之贏是亦平遷行有峻擢某末由旅賀例辱異牋卿

不同乎已升華於玄冕公歸無所會加寵於繡裳

代回淮西趙總卿

李梅亭

陞卿九扈給餽列屯人在日邊恩榮畫錦之遣錢流地上師有宿飽之期下車云初載路相慶某官直温而肅括明敏而疏通早練達於民庸嗣講明於邦計懋轉輸之績飛不盡翰持經濟之材翔而後集屬邊防之小定惟糧道之孔艱爰興前席之思久不見賈復念弄印而授無以易堯庸疏報羔之榮俾專流馬之運序王人於

諸侯之上姑驅馳數月之間求宰相於宗室之中會凌厲九人之後某託交惟舊話別方新闢伺眈龜正欲致燕省之賀勤渠專騎乃先辱鯉魚之書徒華巾笥之藏莫遂襜褕之報

都大類

賀坑冶都大司

方烏山

擢自輔藩改司泉府一奏日邊之最聖德久享半提天下之封使名加大輿情胥屬儒效必優恭惟某官生廬

山之下而挹其高近濂溪之居而得其正去之千載固
將會洙泗之傳覺以一心抑又契象山之妙冊勲文陣
擢冠禮闈卽典教於類宮繼升華於學省講道於髮引
千鈞之際日耀羣迷談經於坐奪重席之時永融衆難
斯文允屬善類攸歸權勢不能挽之來利祿不能誘之
去蓋嘗慷慨而極陳當世之務不以扞格而遂易平生
之言屬者分符俄而易鎮朝方嚴於楮令郡恐失於民
心平時既切於撫摩一旦忍施於科抑及聞改擢悉願

攀留卧之轍下者何其多送之境上者何其遠細數會稽之父老今殆過之自開太末之山川古未見此遂奪袴襦之愛來司寶貨之權浴鐵之泉寢枯採銅之山已竭海道難防於滲漏姦民弗禁於鈺銷糜幾孔方成一阿堵以裕民之心而裕國必權輕重之宜推鑄金之術而鑄人竝究經綸之大某猥由壁水濫竊儒科屬峒寇之披猖敢於梗化俄憲臺之辟致因以奏功徒自笑於棄繻乃更叨於通籍男邦學製垂解組於膏火之中督

府出征俾奉檄於煙塵之際籌邊適逢於改轍佐郡曷
稱於題輿版曹有山積之逋州縣無天雨之賦若為施
設庶免曠鰥豈期幸會之來獲隸按臨之下龍門三級
忝嘗攀附於遐蹤燕厦萬間願託帡幪之大庇

賀提點坑冶俞郎中

陳篋牕

正朝渙號園府升華舉刺史九路之天全歸臨照以君
人四海之地半入甄陶弄印無以易堯起家使之拜敬
亶云妙東大慰僉諧某官德宇閱深量陂汪洋干將莫

邪之氣上衝斗牛黃鍾大呂之音中涵韶濩久低徊於
州縣旋騰蹕於班行輸寫瑰竒發揮忠蓋自令干霄直
上贊中禁之謀猷而獨貼水斜飛試外臺之勲績蓋由
園法正輸上憂散之易而歛之難徒有日星之憲積者
寡而用者衆誰憐天地之藏田野已為之顰眉廟堂幾
至於束手欲辦乃事其惟我公昔王夷甫恥而不言自
是清虛之論而賈洛陽以此進諫未妨通達之稱惟徹
上徹下而不失之拘則入細入麤而各由其理固知猥

冗不礙孤高欲觀他年造劍之爐是即今日鑄金之冶
某違離滋久懷戀深深霜雪欺頭已阻攀於軌躅塵埃
撲面又弗慣於書題敢云守壘之微叨隸使輶之下雖
蹈仁詠義之念樂與人同而薰和染教之思無如我舊
願垂洪庇以幸孤生

賀川秦茶馬魏戶部

王臞軒

顯陟臺郎總提殿政文昌六部地方見謂之劇曹武騎
萬營天府復專於隆委祿因德詔材與事宜某官心平

而氣和人今而學古公侯子孫之必復固有世臣名義
鬼神之難欺實由家學琮璧不雕而自貴鸞和隨動而
有聲屹立夔人之藩籬何翅晉陽之保障儉以足用節
而愛人迄轉上聞首膺表選握蘭依烏之位內陪從於
太微摘茗市駿之司外分節於少府職任昔分而今合
事權滋重以不輕一洗空萬古之凡會旋雲錦六經濟
三尺之法歸近天顏輕破睡正濃之歌行試思無邪之
學其苦慚駑骨復飲墓願王良後造父先亦有馳驅之

志汲黯慙寬饒猛恐非採掇之才

通史都大

林克齋

擁騎經塗辱軫朋簪之舊剖符疊組欣依使節之光雖
司存分兩地之遙然巨庇喜二天之近故馳尺牘先贄
寸忱某官家世象近魁三人物今稱第一積慶實綿於
錦繡雅懷不在於綺紈架上萬牙籤一讀不再胸中五
色線小出無前激昂尤奮於事功談笑可空於盤錯自
疇庸於貳郡屢疏寵於十行實簡清衷肆臨巨鎮賢良

選用固將解渤海之佩刀功績垂成謂可折東山之屐
齒沮謀者孰袖手何言方為五畝園獨樂之遊復膺二
千石共理之寄河東吾股肱郡未遠邦畿番君得江湖
心已稱理效矧冶鑄莫饒於吳越而提封幾遍於東南
佇觀地上之錢流即聽日邊之璽召某受才甚下賦分
多竒頃迄役於計臺嘗誇名於書府屬當逃谷詎意起
家寮底一官隨行逐隊江臯十載自西徂東賡伐木之
詩夫豈若秦之視越仰皇華之使或容羅石以致温

代通四川趙茶馬

戴象麓

分巴徼之旌旗濫膺守土占益州之分野知有使星欣
竊庇之自今愧脩詞之已晚恭惟某官風猷凝遠天韻
宏深博極羣書太乙之藜相照文焰萬丈長庚之夢不
虛藉未陳周召之詩書亦宜獻間平之禮樂恬為丞之
再轉甘出守之一麾刻銅虎之符游揚美最護木牛之
餉益茂膚功謂宜運海以搏鵬又使摘山而市駿周原
之茶膺膺包以緡奩魯垞之馬駟馬爛如雲錦豈容黔

突行有紫泥某頓頓之資疎鹵於事將指以出濫持天子之節旄無功而還不得月氏之要領敢意冒升於荷橐且令假守於銅梁有如凌兢何以全度東西之瞻使節儻未賦於旋歸前後之間清塵尚有餘於同味

回史都大

李梅亭

光奉宸綸真除使節方千里而賦政久歛惠於一州圜九府以通財遂褰華於數路某官人門有偉風調不凡番君得江湖之心不但蕃宣之績史公引漳鄴之利更

高城築之功暫司坯冶之權洞識貨財之本恩隆正任
使以大名地上流錢會當裕子母之積階前生玉行將
繼叔父之風某密託鄰光遠依厦庇六轡如組未皇瞻
原隰之華萬物為銅益願楸陶鎔之業

代回張茶馬

李梅亭

奏最蕃宣易司權牧卧雲而逼象緯榮分東壁之光摘
山而市駿蹄益固西秦之圉某官味甘苦永心秉塞淵
出乘兩腋之清風已親法駕勒回中道之奔電歸扞渴

美茲揚春山之旗久擁東方之騎非環非玦上有雙鸞
載馳載驅駕彼四牡取月團三百片之羨包以緇奩供
天子十二閑之須爛如雲錦竚頒鳳詔趣扈龍旗某有
味溪芽無心天駟烹玉澆過秦之論徒抱渴塵竊爾雲作
徠漢之歌更觀逸足

提舶類

通提舉魏市舶

鄭雪巖

錦纜牙檣暫督邦珍之貢朱幡皂蓋獲依鄰壁之輝寸

心躍如尺櫝敬止恭惟某官爽邦括匠瑞世竒才懷鄭
公仁義之言家聲故在立漢世中興之業相學有傳至
今吾五峯三市之民猶誦公半刺十同之政謙恭下士
懇切憂民洎造清班益隆雅望輟工監勾稽之職洗桐
城愁嘆之聲民欲借恂帝思見賈自合歷階而上矣奚
為弭節以來斯惟邦計之方殷故利權之攸寄飛蝗逐
浪報合浦之珠還貢寶充庭侈南夷之琛獻乘軺底績
荷橐指期某未習民庸猥承郡寄正自面牆於不學得

無血指於旁觀尚惟聯事之心時賜免戾之教惟餘波
及晉肯分滲漉之恩庶小國間齊獲遂依歸之願

通趙舶使

王暉軒

翠節光華竦望宗英於霄漢青衫藍縷分甘蒼氏之塵
埃幾年引脰以仰高一旦澡身而受察敬憑子墨徃白
帥籤恭惟某官紉芳蘭而自馨挺靈芝之獨秀追河間
於千載後得禮樂之盛心夢太白於三生前傳文章之
正印既收魏第不輟燈火雖在素官全似布韋為藍田

哦竹之游清哉官况試河陽栽花之手籍甚風流此雖
緒餘獨不俊偉繼嘗憑軾無端溪隻硯之歸纔一擁幡
覺濱水甘棠之滿得地小而亦可行志去天遠而隨即
疇庸眷海舶之一司關水衡之大計惟帝遴選煩公一
來庶平而吏民安焉鯨波不動忠信而蠻貊行矣琛貢
交通合浦之珠既去復還石門之泉不易其介大而國
用盈虛之制即此權輿次而版曹出納之權歸其掌握
行有召命以重此臺伏念其聞道未深涉世尚淺讀書

發憤期收再世之青蘊射策決科濫竊一名於黃甲方
習趨庭之訓遽懼陟岵之憂謀養斗升七稔飢寒之所
牯強顏筦庫一官猥屑而亦甘惟不武之書生殊弗閑
於吏事祇恐斗筭之器難逃冰鏡之前念伯父曾忝交
承夙有通家之好則賤子雖無介紹此為藉手之階倘
以臭味之略同庶幾眴睐之稍異服鹽車而垂兩耳願
殫駑力之勞得廣厦之庇萬間可遂歡顏之託

通林泉使

方秋崖

伏以寶冶騰暉切仰韓文公之斗銅章課政有開蘇刺
史之天可無傳鯉之書告以眈龜之日恭惟某官五鳳
樓之巨筆九龍箕之大鏞繇孔壁汲冢先秦古書以來
口授若決雲夢凡周誥殷盤莊騷太史所錄手抉以分
天章要是道山神仙之流盡絕人間煙火之氣何至屈
臨於園府聽其久去於方壺仰窺上心斷有深意謂朝
廷推山澤之利繫欲上足國而下足民惟君子知財貨
之源能使輕權母而重權子俗吏念不到此吾儒容可

忽諸如其推鑄金以鑄人即所謂範模而範世三節召
矣一陶冶之某鹿鹿無奇魚魚自守六題十二體故家
之衣鉢猶存五車數萬言矮牕之燈火良苦迺鬱鬱而
居此豈區區之所期粵自落南幾於敗北偶脫黃茅之
瘴通班紫禁之雲竟分邑於山間如置身於井底飛尚
方之駟敢以硯新而擾為有造化之爐毋曰鑛頑而棄
去

通王泉使

洪平齋

伏以帥閭疇庸治臺陟寵行行且止而避御史威望素
高皇皇者華而遣使臣利權增重八鸞蒞止百雉聳觀
恭惟某官氣直而剛學純且博垂大名於方策之上殆
四十年表清規於搢紳之間纔一二數入造翔鴻之序
進升莪豸之班當瀾倒之衝而定力不移有壁立之風
而危言自信人方玩積薪之勢公獨為曲突之謀發巨
奸於間不容穢之時制大變於危如累卵之勢盡奪羣
邪之氣復開衆正之塗雍齒且侯魯連已去吾在汶上

矣誰為留行君薄淮陽耶不妨卧治方寬北顧又趣
東來闡天地之藏於笑談運造化之功於掌握不勞笏
畫自見錢流雖心計之長正難其人然風采之著寧久
於此立九府之園法小施橐籥之功陳六符之泰階即
試陶鈞之手某自甘獨冷共笑太清久矣獲從諸公之
遊今焉幸際一世之望倘許執經而問難庶幾就道以
漸摩江左之見夷吾何難富國汝南之有顏子正賴鑄
人欽嚮惟多鋪張罔究

回聶提舶

李梅亭

肅駕星軺總司海舶舳艫千里有無得以懋遷胡越一
家內外服其平準是為膚使允屬通材某官世濟象賢
早騰燕譽青氈舊物盍旋北斗之樞畫戟凝香晚試南
交之宅不嚴而化所去見思惟是嶺陬久資礎稅扶胥
黃木習廉介之具孚銀甕白環紛貢珍之並入貪泉酌
水已知吳隱之心祥飈送颿佇應孔戣之召某卜鄰有
幸賀厦已稽六秬五羊難續遊仙之夢尺書雙鯉空慙

寄驛之情

回趙提舶

李梅亭

奏課分符乘軺司舶候風入貢固嘗聚蠻越之珍酌水
獻箴要當試夷齊之飲聞君廉甚職此宜哉某官蔚若
宗英濟之世美再試絃歌之政所去見思一陶襦袴之
功不嚴而治惟時嶺外交貨浪中然商賈算至舟車漢
非得已若犀珠賄及僕隸唐已病之今大夫不務富其
家則行旅必願出於市得人如此通國稱之某雖縻於

茲行引而去露螢不暖安得照十二乘之車檣燕語留
旋復答咫尺書之使

翰苑新書續集卷十二

欽定四庫全書

翰苑新書續集卷十三

漕使類

賀尹漕

方秋崖

伏審備才匠監將指神臯蕭相國轉漕關中盍為根本
之計范孟博澄清天下莫先輦轂之間上意則然師言
惟允某藐茲宗邱恃有使軺我獨二天無忘麟趾之仁
厚畿方千里但瞻牡轡之光華無數頌言等祈涵在

賀鄭漕

王臞軒

矯首計臺藹五色慶雲之瑞抗顏宗校依一道德星之
輝敬飭墨卿晉干籤帥某官學到聖處氣涵天和文獻
猶存籍甚南方之大鄭經綸未了付之東閣之名郎方
在盛年已負遠畧三仕為令錦每製而愈鮮千里監州
輿一題而增重入司奏邸端貳理庭袖中有醫國方舌
底有冰人語不為枉尋直尺而屈甘請高牙大纛而行
剖竹兩藩甘棠婆娑而籠晝司泉九路李蹊拍塞以酣

春召以潛郎迫於熱地使其道之少貶顧何官之不為
去矣莫留重歌今袴迨其再入即復舊羶芳菲菲兮彌
章道落落兮難合雖以此起諸賢之愛敬然亦能來羣
兒之中傷晚節自是而益香物論翕然而歸重七閩善
地屬有弄兵之虞一札起家來任登車之寄策勲者摘
將指轉輸足食而又足兵易節而不易地褰帷問俗出
隻手以活民攬轡澄清炯雙眸而察吏甚盛之事不一
能言之類皆知惟是國事日新善類星聚如公德望宜

還簪筆之班副上春知行聽履聲之近伏念某癖惟嗜
古樣不入時射策廣廷徒有空臆盡言之直校文列陛
乃惟疾聲大呼之讒一從沙汰而歸三閱歲華之久竭
來倚席寒甚無羶靖惟外郎之冷官實隸皇華之末屬
見聞甚淺易招雪日之嘲名實未孚凜有風霜之懼此
因假道幸甚登門誤蒙倒屣之迎宛似摳衣之舊諒憐
氣類必賜提撕持一瓣香願定價牆屏之下有三品筆
覲叨居香案之前心旌所期舌筆莫罄

賀高運使

方秋崖

伏審輟自鵷墀誕分虎節引星辰於碧落有開蜀道之
天將禮樂之皇華不遠長安之日竊窺帝意深有廟謨
若曰當宁思古名臣其惟武侯為時王佐每讀出師之
表無慚伊訓之書雖吳魏自裂而三分豈漢賊可岐而
兩立草廬所蘊竹簡莫傳蓋卧龍之蟄匪徒然繫流馬
之運其小者乃睽西土而凜有遺跡寬予北顧者詎無
若人幸今天道之好還大快人情之共憤何止扼吭而

拊其背已焚老上之庭恨不食肉而寢其皮爰戮防風
之骨然亡彼之未幾方鄰此之可憂試嘗以唐書與五
代史而攷之其見於中國亦三百年而餘矣既鯨吞以
相啗曾蠶食之無厭如使狂騁於封域之間奚啻鼯睡
於卧榻之側吾恐患方深耳見謂一秦之復生公其起
而圖之從無百參而何缺若然則朝家之委寄夫豈惟
使者之將輸聞之縉紳偉哉綸綍恭惟道山蓬萊之胸
次楚澤雲夢之筆端當其排閭闔而呈琅玕信已跨崑

崙而餐沆瀣迺煩視草出以飛芻意者復周土宇而興
六月之師其必張漢天聲而決千里之勝飽吾貔貅取
彼鯨鯢折尺筭而答之不留賊以遺君父無隻輪之返
者迄安邊而立功名使鼎湖弓劍之藏與渭上衣冠之
廟正氣開而天地闢兵氛掃而河洛清則多多益辦之
勲皆陳陳相因之助以故誦言乎諸葛不復比數於蕭
何某布所聞匪為之佞逢此盛舉未嘗不嘆曰江左之
有夷吾遲之幾何將亦相戒以中國之相司馬惟抵掌

而談天下之事豈折腰而及吾身之私其若翹瞻莫殫忻
頌

賀李運使

李梅亭

起家將漕揭節濟湘舊令尹之雙鳧甫去十五年之近
部刺史之四牡今察二千石而來民踴躍以爭迎公馳
驅其何憚某官篤誠而明允簡要而清通言行擇君子
之中庸德業得賢人之久大十年出幕孰居行營司馬
之前萬里封侯乃在諸妄校尉之後勇撲望郎之被出

褰膚使之帷爰從綠波青草之間盡覽赤甲白鹽之勝
金掌甫升於卿月玉鈐又屬之將星與其食武昌之魚
又看種柳不若蠟永嘉之屐少待戍瓜有懷清絕之大
招復賦皇華之小雅暮捲西山之雨曉行湘水之春洞
庭無波聊護木牛之運牂牁為郡歡知竹馬之迎有功
見知不遠伊邇某強顏佐郡偃指終更非有海沂之功
可歌別駕豈謂瀟湘之地又逢故人偶聞報之不先慚
奏記之已晚倘憐秋水長天之共且善助之庶安清風

明月之分會且歸矣

賀曾運使

戴象麓

光膺宸命榮領計臺兩載欽刑已深種平反之福一朝
移節又暫煩飛輓之勞喜依比之又新豈馳牋之敢後
某官名家貴胄問世鉅賢濟濟侯門迭奏壘篲之美雍
雍仕路俱蒙旒冕之知海宇覩之如景星慶雲國家寶
之猶黃琮蒼璧萬頃胸襟之波量四時德宇之天和惟
平生鄙腐儒之空談故所學極古人之遠到自司邦憲

務合人情吏固多奸自屏聲而退聽民豈無瘼皆吐氣
以獲伸既施利器於盤根宜駕輕車於熟路然自贛川
而北久陶忠厚之風由洪都以南尤任轉輸之重載念
祥刑之已久緬懷將漕之尤艱與其以此付之它人孰
若舉而屬之已效按臨雖舊寵數惟新暫遲校芸視草
之功少視飛芻輓粟之任欲了邊頭之萬竈須煩馬上
之一鞭不妨時訪西山賡畫棟朱簾之句行即詔歸北
闕伴紫薇紅藥之吟某備數一同強顏三仕雖繭絲保

障粗知當務之先奈獄訟催科莫道有司之責幸際福星之移次深懷明月以棲枝即今位牛斗之墟已深歸向非晚歸鳳池之上尤望陶鈞

賀湖北游運使

九功

真西山

渙綸將漕疊組分符皂蓋乘邊久簡宸衷之聽皇華攬轡肆嚴麾節之榮眷倚彌隆訓辭增寵某官識優致遠才裕剗煩傳西洛之正宗學問遙承於先哲嗣南軒之洪派見聞復接於難兄粵題峴首之屏游剖邊頭之竹

風生畫戟天屹長城陳樽俎之折衝搃羶裘而褫魄馳
金城而上方畧勛多戎索之恢披銀臺而連奏書績茂
蕃方之剡亟膺異渥趣駕輜車士知宿飽之有期人謂
勝形之增重處客而賦鸚鵡未妨領略於江山入對而
隨孔鸞看即塞翔於軒陛某睽遠丰度荏苒歲年謬膺
外閫之雄實接上游之勢羽毛自出願希及晉之餘唇
齒相依更切全虞之望

賀廣西憲得郡除漕

劉後村

渙發綸音鼎新軺傳由霜臺而綰銅虎方歌襦袴於康
樂之城輟星麾而問木牛又總舟車於都督之府熒煌
禮樂傾動衣冠竊惟聖天子每當饋以念民必得大膚
使中持衡而體國波平不激山立莫移然後能周知田
家補瘡剝肉之勤庶幾不肯為俗吏剝髓椎肌之事熟
視弄印誰為朕行遐思剖符莫如公可宜亟辭於皂蓋
遂加賜之錦袍凝然惠和醫此凋瘵恭惟某官千載風
流之人物一家心學之門庭團和氣坐春風冲襟可掬

懷連城佩明月至寶不珉輝映弟兄之斯文發施聖賢
之所蘊既平反於玉節盍勸講於金華而且訪盧肇讀
書之臺凝香森戟謝韓愈把麾之職輓粟飛芻何綽著
於外庸尚小賒於中召豈洪都素號於襟帶而潢池方
寢於干戈宿重兵萬竈之分屯更期淨洗竭民力百年
之供億頗覺煎熬宜奪二千石郡太守之印章復領一
十州部使者之繡斧滲漏樽節豈規規流地之錢調度
通融非屑屑雨天之粟即廉平之兩字底績用之萬全

澄清天下而術不疎文靖已竒於公素漕運關中而用
常足鄴侯即相於高皇某愚不似人戇難徇俗少年刻
志未甘相如山澤之癯積憂熏心無復元龍湖海之氣
彫敝武城之邑瘡痍單父之民縱敏手以何為况拙材
之如許忽聽福星之移次喜知明月之安枝蓋素聞平
時愛士之心可預知今日察吏之意率然賀語允也歡
悰使臣之遣遠而有光切想閭閻之鼓舞儒生之病博
而寡要尚祈厦屋之幷幪

賀余運使除煥章閣陞副使

鄭雪巖

伏以漢漕同寅獲尾冬烝之除目堯章晉直尚分日甸
之餘輝自懷乘負之羞喜有厦成之托恭惟某官性天
圭璧門地鈞衡充然寬大以能容靜而有守投之繁劇
而不亂來則能名錄浙右諮詢之勞付關中轉輸之計
宮禁繕脩之莫會自昔惟難州縣權酷之既移於今豈
易公能妙幹上所深嘉武監褒崇爰有絲綸之煥宸旒
簡記尚遲劔履之升重以使權加之寶直歌枕朝雞之

唱未遠天顏接武儀鳳之班仍聯帝輔某受知已久竊
庇又新幸壽昌之糴粗登無寇恂之才可借正如倦鳥
忽爾傍龍同日拜恩亦奈一時之升擢觀風受察尚私
千里之照臨

賀諸葛提刑除漕使

劉後村

妙選名儒就陞計使雖三山父老惜郎宿之暫移然七
聚生靈幸福星之未改統臨所暨拊蹈惟均某官氣塞
兩間名高九牧地負海涵之氣貫串百家日光玉潔之

文流傳萬口科目足以發身而易退難進才業足以用世而深藏若虛晚遇先皇寢陪羣彥登車湖嶠凜白芷之風馨回首闕廷悵蒼梧之雲遠屬者睿明繼照耆舊具思乃從故楚之區來按全閩之境聞其風旨則善良吐氣挹其標致則鄙薄革心於和氣祥雲之中有嚴霜烈日之意茲移使指就駕漕車得非煮摘利饒轉輸權重上於鹽鐵之論有感方欲變通公於王伯之辨素嚴必知取予深闢富强之說痛懲聚斂之人養基本以厚

黎元捐錐刀以惠商賈承風問俗脩明此日之皇華足
國裕民講貫定時之相業佇看環召式輅袞歸其猥以
孤生試茲劇邑雖終年勞苦無赫赫之可書然一念拊
摩有蒼蒼之在上日者躬負弩矢郊迎繡衣初乏先容
頗垂異顧方念寒蹤之奚託所欣春脚之潛回繫昔教
條謹遵承於下邑矧今命脈實操制於上臺矯首雲天
委身造化願憫負山之力少推煮海之波企淵明歸去
之風豈勝有愧處孟博澄清之下或可無憂

賀曾守除江西漕使

王臞軒

陞班奎閣持節霜臺壺峯老倪方卧清白史君之轍鬱
孤泉石歡迎皇華使者之車召命鼎來上意可卜某官
家有相譜學為儒宗大筆如椽挹紫帽扶輿之氣片心
止水貯金莖沆瀣之清凡所植立設施見謂光明俊偉
惟莆千里私我二天禹稷飢溺之思歷千里如一日召
杜父母之政合萬口無異辭試舉其凡可放而數庶足
以律貪而起懦敏足以剗劇而理繁聽斷公則大姓不

得以腴細民保障嚴則他盜不足以闖吾圉出緡於帑
代輸十萬戶之租時粟於倉永遺千百年之利以至增
益學廩表章貢闈每加惠於章縫可遺芳於簡牘士勒
碑而載美民肖像以立祠僉願借寇恂之一年無階而
可又安得元結之數輩吐氣者多炷南豐之香而祝長
年熟浮屠之燈而無虛夕歸裝何有人知鶴料之蕭條
福果不差天遣麟兒之抱送好語流傳於樂職芳名登
錄於御屏就畀大藩邁放英蕩二州爭祁公於治境俱

繫人心一道得鮮于為福星可覘天意蓋巨鎮莫如於
江右而弄兵未解於潢池帝念民勞欲復佩犢帶牛之
俗公持使指立伸斷蛟剝兕之威兵刑之重寄有歸臺
府之大權增重先聲震疊夙駕馳驅授馘獻俘談笑了
一方之事策勲飲至從容歸四近之班某倚席宗庠托
身德宇屬有采薪之疾致稽拂繭之恭然受助不後於
小人諒知遇必原其細過簷花細雨謾為首着之愁吟
檄草飛風空羨芙蓉之妙選

上趙運使

劉後村

長淮遣使少迂華省之望郎支郡東僚誤及遠方之寒
士嘗牢辭而不獲祇嚴命以亟行踰瞻雙節之威冒致
一牋之敬某官疏通而密察宏毅而裕和讀鴻寶之書
見聞洽甚生麟趾之世信厚藹然早講學於河汾且溯
源於伊洛四海共推於名勝一門獨擅於弟兄至今天
台赤城之區視昔河間東平之國風雲凌厲孰不期射
策之初歲月逶迤猶待課鳴絃之最及上更於聖化方

下覽於德輝謂陪豹尾之間乃剖魚符而去果頒召札
趣澤覲圭徧履清華久負丞郎之望並游英俊半登供
奉之班屬淮更凋敝之餘而帝遴澄清之選亟濡六轡
徃建兩臺方固藩籬凜若邊防之未弛已空杼軸蕭然
民力之可哀諒衣繡之光華首褰帷而廉按修明斥堠
賑貸儉荒內安鴻雁之離居外使馬牛之被野周原諏
度顧何憚於載馳漢殿論思行有光於三入某為儒不
力入仕以恩少也讀書亦欲激昂而自見壯而涉事方

知迂濶之難行又况憂患之所耗亡疾疢之所侵蝕已
決買山之策苦陳摠墓之言長榜注官甘守閩中之次
大鈞播物俾為塞上之行了無騎鶴之資幾有葬魚之
厄罄生涯之漂蕩環幼稚之啼號未定驚魂來趣賤守
自揣拙疎之極不逃臨察之公雖安邊境立功名固大
禪於廟算而悉聰明致忠愛冀少助于平反

上趙都運

王耀軒

先世同曲江之集桂籍猶香末僚依近水之臺蓮池有

潤行澡躬而受察先泚筆以通名恭惟某官尊主庇
民之盛心通今博古之正學德容冲粹翔鳳儀白玉之
磬文律森嚴瑞麟掣黃金之鑰二紀斜飛於州縣一朝
入對於班聯總籍仙源益茂帝宗之枝葉翬籌台佐養
成相業之規模盤礴乎雉監稼卿讎正乎芸籤縹帙多
閱義理大有建明屬主計於京畿旋陞華於傑閣東南
之力竭矣上下焦熬西北之事紛然符移旁午仰十五
州之歲計贍數百萬之軍儲緩之則徃徃之需急之則

元元告瘁今士夫清談之弊胥溺波流明執事體國之忠可與天對每當事機之有肯綮處以談笑而無留難鞭不算而足國裕民轡一攬而澄清激濁京師大計之先定境土再復之可期給餉第一功行封莫先於蕭相弄印凡幾月熟視無易於趙堯况登先忠定於初元自有我寧宗之故事伏念某性天不穎家地最寒少而熊膽之苦嘗壯也羊腸之飽歷文闈鏖戰被體百創斯陛策名避人三舍初入星沙之幕遽罹風木之憂既不及

親何樂一行作吏早知有命悔不十年讀書行將贊畫
於帥垣自愧未閑於宦譜狷介成癖鯁曠莫逃念臺府
本同體之戚休而僚屬如一家之子弟况叔教之後今
且困誰實念之而山公既在汝不孤賴有此耳諒在高
誼必為動心庇覆之以喬雲甘露之光獎借之以大呂
黃鍾之重苟垂金鑄庶可玉成事長必恭如在察父括
兄之側進身有望或叨門人小子之榮詞短意長形留
神往

通王運使

劉後村

皇華望重極霄漢之尊嚴墨綬官卑近風霜而震懾行
矣熟瓜而問戍悚然席藁以登名恭惟某官宣慈而惠
和辯智而閱達昔在元祐比明道慶歷之隆於惟樞臣
為君實晦叔之黨去之千載猶有生氣奮乎百世可與
懦夫至今諫書具列國史魯臧孫之後蓋有聞人唐鄭
公之孫克有前烈而况種花者再剖竹至三累遷李庭
兩入蘭省縱未幹旋於魁柄亦宜扈從於屬車昨屬公

朝惠顧七閩之樂土暫煩郎使出為一路之福星無疾聲
急呼於戶庭有陰功隱德於田里威搖山岳而未嘗輕
發明燭毫末而不忍盡施每竊聞輿人之言謂深得奉
使之體新天子不世之主方欲中興士大夫如公之才
豈容外處風雲之會刻漏以須伏念某見擯名場嘗遊
邊地慕安期生之畫策始亦談兵尚魯仲連之為人已
而拂袖因營水菽聊欲絃歌俗尚氣而輕生官恃鹽而
為命務為急急既不便於民間如付悠悠又恐虧於公

上凡崇臺之操縱闔下邑之慘舒非少推煇海之波安
得有負山之力雖斷無異政能臻馴雉之祥當恪守寬
條深戒烹鮮之擾惓惓之至縷縷莫殫

通張運使

李梅亭

飲水西江未及瞻舍人之樣披雲南岳行當參都漕之
臺欲提甕承上累膚使寸丹炯若尺素布之恭惟某官
心契九秋眼高四海周情孔思探鳳髓以調膠宋艷班
香拔鯨牙於刺手早司存於雨露既感會於風雲厭承

明之廬人共期於三立歸靈光之殿天寶相其獨存聊
歌小雅之皇華來領大招之清絕上原下隰拓長沙千
里之平重江複湖護洞庭九州之大齒髮未凋於計相
腹心當屬於留侯豈舍王哉今召君矣伏念某蟬聯成
紀鳧徙臨川家故一寒無蚍蜉蟻子之援官仍獨冷有驪
駒狗曲之嘲歸尋黃獨之苗甘老青精之飯猥蒙文石
之陞俾讀武岡之銘自非使者之汝容轉恐丞哉之余
負鄉人見孺子之入諒亦惻於仁心長史無宰相之才

詎敢干於薦口

通陳漕使

王臞軒

庾臺奏最計傳陞華昔長沙星聚之年翹英金甲今衡
嶽雲開之旦增煥繡衣因緣三紀之符鼓舞百城之下
敢裁吉語敬候前驅某官表粹而裏則剛人今而道實
古出處語默安行大易之中清任和時見謂聖人之耦
及值明昌之更化不緣介紹以立朝士如羣蟻之慕羶
皇皇人爵公若飛鴻之避弋落落權門不然胡勇退於

中流而乃甘斜飛於外補重湖千里在天一方發廩賑
民思慮周詳於田里乘輶察吏精神鎮壓於山川歡聲
溢於道路之口碑實政紀於山林之野史時適轉輸之
擇使重其權乃重其入上知斂散之有方易其節不易
其地惟是歲飢人困川竭谷虛節以制而弗傷財乃執
事平時之素學不斂民而足用度亦前賢此地之遺規
惟人心既久於相孚雖皇華未至而先喜福星照耀非
一道之宜私時雨沾濡又四方之屬望伏念某癖惟嗜

古樣不入時每持直道以事人安敢大言而忤世諸大夫之唯而周舍之諤見者忌之一齊人之傳而衆楚之咻嘻其甚矣方未見先生而親炙深有疑或者之肆護及三薰三沐以來前荷載笑載言而加拊既有師門之歸倚何虞宦路之險巖寒士之依主人倘許一瓣香之請小人之有老母庶諧三釜粟之謀

通陳漕使

方秋崖

伏以溯函丈之席無日不仰於緒談奉咫尺之書此意

獨馳於清夢諒記韓門之弟子自羞吳下之阿蒙每聞
華除有懷雅望雖莫激西江之水洗此傾思惟具瞻北
斗之躔為之贊喜恭惟某官骨格金莖之露精神玉壺
之冰吸沆瀣而餐朝霞幾欲絕人間煙火之氣被明月
而佩寶璐要自是天上神仙之流方其駕蟾蜍而飛固
已搏鷗鵬而上有用之學無施不能銅虎符竹使符兩
入三刀之夢木牛運流馬運載歌萬靈之屯諒迄外庸
式適中詔出駘蕩經馭娑華涂在步武之間叫閭闔呈

琅玕高論妙語言之外僉所矚者身其見之某肝髑無
竒頭顱如許夜讀寒窓之雪有負初心曉看前山之雲
居懷慚色雖了癡兒之事不幾俗吏之為事先生于茲
有年恍記馬融之絳帳見似人足然而喜寧忘范叔之
緋袍

通兩浙運使朱都承

劉後村

投身吏職問譜山陰引領使華有廬汾曲室邇獨思於
人遠波及猶冀於君餘三沐含芳一牋奏敬某官以神

峰之雋加朗月之如科斗字屋壁藏獨傳文獻菟首射
俎豆禮猶有典型鄙王福時續詩書之亡小邵伯溫集
見聞之錄有功絕學是似前人慶元黨禁則卷而懷嘉
定化更則翔而集將有達者仰盛德之傳家其在茲乎
為斯文而吐氣而乃舟引而去轍環於行幾年不到于
釣天一節近趨於幾日方經濟圖維之有賴何論思獻
納之足云某徒抱浮名不償實用少時祖逖嘗有北清
中原之心中歲義之欲為東遊滄海之計耕釣有林泉

之趣絃歌為菽水而行昔過考亭故居嘗登武夷精舍
徘徊如至闕里夢寐想見文公豈知高山仰止之邦乃
為有錦使製之地生芻一束斷可脩墓陵之恭玉海千
尋獨恨阻鯉庭之識非敢叙大父老人之舊好盍願聞
先生長者之緒言輒持空函以代古贄世情甚薄誰肯
憐瓠葉之交高誼未寒尤垂軫練裙之子

回潼川提刑權轉運謝太博

興甫

李梅亭

守蔽蒂之甘崇正疑謫滿歌逶遲之苞栩敢冒恩除甚
慚不蓄而畚又權無麵之餅亟從控避猥辱褒期恭惟
某官心和而氣平人今而學古源流自康樂之裔洒落
有宣遠之風招館下之諸生詎訾猗苓之進展治中之
別駕不辭驥足之淹尋牧宅於兩川俱騰歌於五袴手提
文柄心造化爐禮樂遠而光華遂驅雙節師旅因之飢
饑全出一陶茲暫尋香火之間寧得斂雲霄之步重珪
疊組已觀游办之恢然截銜留鞭共看發硯之新若佇

卷十三
遄四牡徑從六飛某已愧代庖詎堪乘傳折楊而和白
雪願亟賦於歸哉轉粟之上青天冀別求於能者

憲使類

賀新浙西陳憲

鄭雪巖

恭審身辭禁闥勇退急流詔起林泉趣來近甸式表玉
旒之眷注俾持繡斧之光華一札初傳八州交慶恭惟
某官志大而氣直學博而用周接東家師友之源流盡
掃支離之習究上世帝王之軌範獨尋精一之歸累先

諸子鳴徑登千佛選仕不擇地志欲康時方召鄴侯給
餉謂不絕也無留孟子歸志而後浩然方當淮漬輟涸
之時豈是野渡舟橫之日有來翔鳳衆賢聚於本朝豈
使白駒伊人藏於空谷姑令將指非久持刑整故步于
雲霄依清光於日月某姿稟雖異出處畧同終歲齏鹽
共聽五更之鳴鐸一時領袖獲隨三舍以彈冠猶記相
會於鐵甕城頭曾約同寅於姑蘇臺上舊吟尚在宿願
方酬思末路之維艱喜故人之相遇重來越俎羞棠陰

之尚存有好斷金想蘭心之未替望塵有喜展牘馳情

賀浙西王憲

洪平齋

恭審文奎寓直憲節升華江上擁麾已見波濤之帖息
日邊衣繡更觀山嶽之動搖一道生風萬殊吐氣恭惟
某官學高柱史望重甘泉東坡六君子之遊恨不全於
此世慶歷三諫官之列記曾見於斯人迅雷破柱而不
驚秋月照潭而自許雖時移而多變終道大以難容付
萬事於醉眼之中發一笑於塵容之外靜觀頽浪獨

能立砥柱於中流出鎮要津但見橫孤舟於野渡有非常
之人物胡不在於朝廷宜諸公包血指之羞而天子思
沃心之助扳援自近臨遣有光紫甸持平要使星沈於
貫索清朝振武已看雲接於蓬萊少焉歸奉萬年之觴
自此遂前半夜之席徑煩補袞坐底迓衡某塵冗埋頭
文移掣肘化金無策五銖赤仄之幾何舐鼎有緣一粒
丹砂而已足彈冠自喜削牘難宣

賀江東譙憲

真西山

中詔起家外臺抗節民懷遺愛昔嘗敷惠澤於畿東帝
睽舊人茲俾按祥刑於江左寬條一布屬部交欣某官
敏識造微英猷邁往班香宋艷文推行遠之工夷清惠
和行有適中之懿自拾巍莪之第亟儀清切之聯七寺
為承朝論稱其端靖九江作牧政聲播於歌謠自陞蘭
省之高華旋總瑤編之筆削禁途甚邇方共徯於平登
風操獨高乃徑成於勇退蓋志本及人而謀身則緩故
官雖在外而行道則同星輝婺女之躔霜肅會稽之野

暫奉真祠之佚良深當宁之思吳越之壤八九州咸屬
按臨之會雲漢之章千萬軸重新寓直之光願無緩於
平反庶不妨於趨覲某揆能甚下席寵過頻八年鵷序
之游六稔鰲坡之直愧大恩之難報乞偏郡以自程敢
謂綸音驟放使指外庸何有內省靡寧同夢釣天曾未
忘於曩契並驅原隰願無靳於良規

賀江西胡憲

洪平齋

恭審總權督鐸兼命亭刑墨經從軍允合古人之變禮

綉衣照里亶為此日之恩榮疊組有光同袍增慶恭惟
某官爽邦括匠名世故家仲連義不帝夫秦而強中國
臧孫宜有後於魯以勸善人手欲擘崑崙太華之山氣
可吞洞庭彭蠡之水官所居而輒大民於去以常思藹
然以儒飾吏之風卓爾移孝為忠之志屬潢池之子尚
偷活於弄兵而新居之民久告艱於和糴調征方急轉
餉非輕惟卿大夫不勝桑梓之憂知聖天子欲弭萑蒲
之警起司飛輓坐領平反昔嘗聞過家上冢之榮乃今

覩就第建臺之寵士惟我公而張膽賊聞此舉以寒心
豈惟飽大軍於薦食之秋抑亦托平民於顛連之地戶
庭出令已知策流馬之勲草木助威佇見革帶牛之俗
好聯棣萼同挈荷囊其舊亦有連頃嘗受察自墮在火
坑之苦待喚回寒谷之春拂拭塵冠喜有九芝之詔追
隨賀履恨無一葦之航

賀潼川李憲除夔憲

洪平齋

自天出綽易地褰帷家人有嚴君焉舊膺此選皇華遣

使臣也今世其官雖曰因避親之嫌亦見善繼人之志
夔藩幸甚梓部駭然某官器重以周材宏且毅與人
忠而執事敬見善明而用心剛四國于蕃茂甘棠之蔽
芾六轡如組訝苞栩之倭遲曾未煖席之間倏有改轍
之命惟西蜀之門戶倚三峽為咽喉昔先正保衡於
此展澄清之志今命汝大正庶乎體欽恤之心遙知叱
馭而驅之會有解印而去者忠信缺矣蓄積缺矣斬勞
霜節之馳錢穀幾何斷獄幾何佇對九宸之間某方依

雲覆忽報星移雖難留有脚之陽春然尚冀歡顏於廣
廈送我而入楚澤固猶恨遠山之遮思君而下渝州會
問訊清溪之發其為忻懌罔既編摩

賀寺丞陳提刑

鄭雪巖

肅膺褒制來按祥刑內通玉筍之班丞聯月寺外秉繡
衣之斧節建霜臺方一道福星之臨如六月甘雨之切
先聲所至僉望已蘇恭惟某官清冷於冰量寬如海六
竒贊畫追戶牖之密謀九葉流芳踵古靈之舊學不求

梯援獨立巖稜涉歷江淮表裏之區諳究荆襄便宜之事功成制幕夢發州刀親提百萬衆熊羆之師盡護十一州斗牛之鎮傳檄而定易地皆然就加按察之權將底輯寧之效師失厥律民被其殃天子遣皇華豈但咨詢而已明公肅王命正觀方略所先蔓固貴於預圖器亦虞於所忌子孔欲著載籍國僑去之而衆心向安斐豹請焚丹書宣子從之而勇夫竭節必叅權義可正紀綱馬首是瞻狙詐作使惟沈幾於掌運之際自消患於

指顧之間昌黎一入而鎮州平令公載驅而回紇拜不
有君子其能國乎必用真儒斯無敵者茂凝績用益固
簡知如某本是書生豈閑武事未除鴉隼良難木鐸之
宣適值鷓鴣張豈顧席羶之冷不免弧矢之為備敢云俎
豆則嘗聞所幸六轡啓塗萬物吐氣登車澄清天下請
自近邦行部課試諸生首迎都騎心之所蘊言則難宣

賀陳憲平寇

戴象麓

螭虬錫命龍節陞華奏捷至三喜悉平於羣醜論功第

一宜峻陟於穹班塗詠交歡臺治愈煥某官精神秋水
談笑春風暗合兵書料賊而如料敵指麾介士擒寇而
必擒王籌策定於樽俎雍容之間號令行於賞罰分明
之際風走十八灘之曉鏡淨潢池天回一十郡之春劔
耕綠野捷書未上朝論聳聞更生幾百萬之窮民冕旒
喜動接武八十一之元士繡斧光增第師中之錫未償
厥功必席前之問始究所學外勞如許寧淹原隰之載
馳中召沓來行見朝廷之大用某身羈雷邑心繞霜臺

側聆恩褒喜倍倫等盍先馳於慶牘愧邀在於遐陬首
用先生作棟梁此日發西江之軛不以下體采葑非異
時歸東閣之鈞

賀曾提刑

王耀軒

疏恩綠綈宣威繡斧清白史君之德政方播湘城皇華
使者之風聲復行閩部敬裁吉牘晉溷賀床某官粹學
本於家庭大名垂於宇宙堂堂先正餘慶歷元祐之典
刑籍籍二難有玉局宛丘之標致春秋方富名字已香

曩者重湖之濱窘於潢池之警孤城危甚飛書走檄之
載塗半刺屹然緩帶輕裘而弭變亦既十萬家之蒙福
居然二千石之即真笳鼓申威嶽后波神之震疊袴襦
詠德稗官野史之流傳惟時七聚之區正簡五刑之寄
乃煩名勝來此平反適惡子之講張倡偷兒之嘯聚周
諏所至雷轟電掣於令下之初奏凱而旋風恬雨霽於
事定之後况南國之棠陰雖舊而西山之葺燾方新士
民素習於教條臺府相為於脈絡馬范之善政如兄弟

特姓不同于張以陰德遺子孫於今復見夜壘頓清於
刁斗晝庭可卧於桁楊僕雖至愚切有過計今之所謂
民賊多長惡而不悛上而苟有仁人盍去病之所在必
欲革帶牛之習當先懲碩鼠之貪至如白粲之價浸穹
牢盆之罔太密此實召戎之本諒闔憂國之懷讞獄暇
時訪南豐道山之墨刻還班有日復西清法從之青氈
伏念某樣不入時癖惟嗜古殿廬校藝疎狂貽怒於要
官宗邸橫經習懶見嘲於羣弟方企崇臺而受察慚無

寸援以為容疇昔先君曾出龍飛之榜中間賤子獲陪
雁序之遊儻以臭味而垂憐庶幾飲啄之無恐有三品
筆誰無收名定價之思持一瓣香敢作噓枯吹生之想

賀葉都鈐權憲

戴象麓

光奉宸綸肅將使指凝香畫戟方歌二千石牧守之良
持斧繡衣又借十一州兵民之重星臨所暨風動攸同
某官人品富韓淵源姬孔黃鍾大呂之氣韻欲隱雷霆
明珠拱璧之文章渾涵星斗議論有諸老典刑者在事

業皆六經學問中來自西山老先生推轂以薦賢而東
閣諸鉅公交口而推重起從鄭里來撫贛川士飽而歌
馬騰于槽旌旗改觀時和且豐農狎於野襦袴興謠姓
名既東於御屏恩寵果頒於褒壘帝謂江西數郡屢罹
寇燬之餘公實斗南一人宜任平反之寄民何幸甚天
實福之奸氓想覲德以賣刀貪吏將聞風而解綬第恐
九重之思費未容百姓之借恂挽升斗以救鮒枯莫展
澄清之志整劔履而趨鵷列即登禁近之華某朴矣亡

庸推之不去試邑無譜鼯鼠之技五窮顧影疇依烏鵲
之枝三統嗟畏塗之歷久而末路之尤艱際會自天幘
幪有地寬其轡勒閑其筋力幸棲身德宇之餘引之康
莊脫之泥塗更引首化鈞之內

通葉憲使

戴象麓

東壁清躔暫領繡衣之斧南昌小吏喜依玉節之麾
搢以身歸大造之陶鎔瀝此膽於細夫之竿牘犯嚴造次
竦命凌兢某官學老而文雄人今而道古真才瑞世炳

炳六泰階之昭符勁節凌霄巖巖九華峰之鍾秀所養
者得孔孟聖賢之定力故發而皆夔高遠大之奇勲自
登龍虎之上游邁展驂騑之雋軌三異奏庸於花縣十
行促覲於楓庭綸院煥揚官無冗爵計司豐衍軍不乏
需當明天子不諱之時居大丈夫敢言之地嘉謀告后
鳳鳴於岡而梧桐以生正色立朝虎猛在山而藜藿不
採望峻回天之力華陞惟月之聯方觀要路之橫翔胡
乃急流之勇退蓋天欲救細民於積年之涸轍故上特

畀大賢以十道之祥刑除命甫馳列城交竦豪黠私相顧而
喪魄問闔得一笑以伸眉蘇孺文果不受故人之私范
孟博真有清天下之志雖江右搃十一州之地願駐蹇
惟恐朝廷不三五日之間別頒褒壘某蟬蛸小用芻狗
棄材家貧而笑饘粥之無田技拙而藉詩書以為業聚
徒庠序飽二十年學舍之齏鹽負米朝晡奉八十歲親
庭之菽水雖鶚板屢升之捷奈龍門萬丈之高迨於癸
未之春始玷慈恩之列仕不擇祿急於為親第一尉如

綫之微而衆務棼絲之集矧茲劇邑之重尤非謏材所
堪倘無歸嚮於中寧免譴訶之及幸戴二天之在上庶
幾一日之能安河漢瞻星漸喜近熒煌之座樓臺得月
願永依臨照之光

通會憲使

戴象麓

綸音錫命繡指陞華人徯公來爭致南豐辨香之敬天
憐民困俾沾西江斗水之波一路得賢萬物吐氣頓首
申慶函之禮披心寫屬吏之歡某官學老而文雄人今

而道古一貫家傳之衣鉢百年相種之簪纓忠孝萃在一門時謂德星聚才猷夔出當世公實廬山高時策足於亨塗即蜚聲於雋軌州縣特小施而已規模有遠到者焉宜十行促覲於日邊胡六轡尚馳於江右帝懷此土允幾罹兵旱之灾公乃福星姑暫出虛危之分威聲所至風采頓新窮寇自束手以願降汚吏亦革心而退聽蛇鼠之害既去鴻雁之居自安不勞指麾悉就條理民何幸甚天實福之登孟博之居行遂澄清之志前宣

室之席即膺石問之榮某眇然書生冒茲邑寄每嘆孤
寒之無援惟知職業之自修其奈迂疎鼠技已窮於五
伊誰憑恃鵲枝空繞者三幸天開臨照之明俾日席餅
蒙之賜益加勉勵庶免譴呵念福泉均父母邦嘗竊河
潤百里海潤千里之芘今職守屬部封下復叨人有一
天獨有二天之仁

通趙憲

王臞軒

衣直指之繡以建臺矧是宗盟之長者從事之衫而入

幕最為吏屬之卑幾年引脰以仰高一旦潔身而受察
倉皇執贄俯偃通名某官稟氣至剛觀道於獨追河間
於千載後得禮樂之盛心夢太白於三生前傳文章之
正印既收科第不輟燈火雖處公族全似布韋謾以緒
餘見之施設固嘗憑軾甘棠參韓木之千尋纔一擁幡
歸索無端溪之隻石在我者大而地無小每官皆清而
人推高司邱泉南遺愛邠洛陽之水剖符湖右驩聲開
衡岳之雲方人物之眇然如執事者有幾歷事三紀而

無朝蹟知榮進之心輕連拜數州而駕輜車况祥刑之
寄重與其枉尺直尋其道屈孰若高牙大纛其志行持
論於三尺外而不苟得情於五覆中而不喜園扉畫掩
貫索夜沈漢廷尉活人者千今視之而倍蓰唐宗室為
相者九將去此以登庸伏念某殖學代耕賣文為活大
廷對策妄陳憂國之孤忠末第書名何惜避人之三舍
冬已迫於瓜戍夏方依於蓮池惟知直道以事人不敢
苟祿而養母昔居隣壤猶懷高山仰止之思今跂使華

敢作明河可親之想如聞雅量徧喜吾儕倘稍賜以寬容庶苟逃於瘴曠筦庫七十家之薦雅知趙文子之憐才厦屋千萬間之依竊喜杜少陵之有託

通章提刑

劉後村

繡衣望重屹立霜臺墨綬權輕謬分雷地辱在通家之子弟素欽當世之儒先問戍云初登名惟謹某官氣涵剛大識造精微烈日嚴霜皜皜立身之潔光風霽月溫溫接物之和究觀平生卓立高節舉世由旁蹊而進惟

公遵大路而行流滯曲臺豈甘為野外之蕪栖遲郎舍
不肯詠觀中之桃自拂衣去乎日邊而仗節徧乎天下
京畿震悚湖嶠肅清平揖權豪不識漢將軍之貴奏繩
將相稍鋤唐節度之強向使謀謨乎廟堂奚止動搖乎
山嶽然且數臨大府復使全閩風生按問之條春屬平
反之筆至明而養以晦若寬其實則嚴君遣使臣雖曰
遠方之蒙福國無君子可勝善類之寒心佇踐禁途還
扶世道靖念某稍通章句不切事情少在兵門嘗秉陳

琳之檄筆晚臨林下始為杜牧之罪言昨授男封蓋謀親養豈意公私掃地憂積如山何止赴湯蹈火之危預起向若望洋之嘆追惟先世豈無托子之交賴有明公獨任恤孤之責且絜提其同氣必容覆於微蹤雖隱然而有憂猶恃此以不恐既為漢令敢言弩矢之羞當學孔門竊慕絃歌之意

通劉提刑

李梅亭

丹墀賜對繡斧詳刑君遣使臣固光華於在遠獄為司

命必明謹而不留一賢觀風萬物吐氣某官器涵方重
識抱浚明胸中風月之無邊一塵不染筆下源泉之不
擇萬斛而羸頃厭承明出將英蕩以九畿施邦正天不
違顏障百川回狂瀾海為縮足顧退須於棨戟復出駕
於軺軒司長沙千里之平惟良折獄澄洞庭九州之大
何擇非人從知察小大之情必不容上下其手周爰咨
度即開衡岳之雲慨然澄清何愧滄浪之水所恐思賢
於宣室還當問路於修門某起家一寒去國三暑強顏

倚席昔慙洛下之生箱尾對牆今補黔中之佐雖云二
郡正隸六條庶不掩聾敢嘆承哉之余負慙今成癖亦
惟使者之汝容

通方提刑

方秋崖

伏以繡衣而立雲漢聿瞻使者之星墨綬而走塵埃竊
歎郎官之宰雖迥有天淵之隔方將戴日月而行敢以
名聞通其懷仰恭惟某官周雅壯猷之老唐詩元勳者
流當其揮玉塵於宗藩固已鏘瓊裾於帝辰胡為紆猷

迺輟鸛班曰古者有德惟刑必吾儒然後知此矧我朝
以仁立國於民生若恐傷之徑煩丹筆之春盡布紫泥
之旨然金科奉九重之敬卹而玉山有一卒之叫謹繫
我甘棠勤公行李持斧而捕盜賊想聞暴公子之威名
騎竹而走兒童復見郭細侯之故事少駐凝香之寢難
稽聽履之朝某徒抱區區見謂碌碌昔我世父竊意為
生馬之駒許以象賢乃畫成類狗之虎歸眠詞林之衣
鉢無忘家世之箕裘粵自落南幾於敗北尉栗陽而吟

借家具寧免郊寒令彭澤而賦歸去來欲從陶隱偶脫瘴煙之澁勒尚驚風雨之漂搖方自拔於選階曾何知於縣譜邑而謂之債邑蓋亦望而駭然民皆可為良民或相安於拙者亦惟綿薄退懼錦傷一婦不織一夫不耕雖廢農桑之課五刑有服五流有宅尚邀鞠草之仁

通李提刑

鄭雪巖

伏以錦帆泊洪流已周咨訪繡衣兼畫戟今易澄清天

子弄印匪輕使臣召環適至尤資風采盡掃瘴塵一聞
令公宣威無復苗民逆命恭惟某官眼空四海量廣八
荒曰文曰武可以全才學書學劍不為小用百篇落筆
不減太白風流萬卷填胸宛似鄴侯韻度鋒芒小試穎
絕卓稱峽開桂陽已小巨川之能濟巢空寧化安有蔓
草之不除笑談折衝整暇止武於赫績用累見褒嘉內
聯寶閣之榮班外作金城之良翰畚耒失律何足煩流
馬之通潢池弄兵其誰慰涸魚之渴先聲所至僉望已

孚西賊聞之皆驚南人自此不反眷鈴府實接於三路而憲臺時置於雙江山川峻激致人性五方之不侔溪峒險巖有習俗百年而未化比隣相刃同里為讐少昧曲突徙薪之防便起烈焰燎原之禍僅雖安集未底堅凝為國深長謀之在公指麾間耳今之事會迭有正以望實為先宣帝聞東海蕭生召歸欲壯本朝之勢仁考以南粵襄公可任永圖百年之安只恐恢復基圖不容淹留旌節豪傑為時出請賡少陵整頓乾坤之詩功業

如山高願繼元結鑄磨石崖之頌某濫吹油幕之下竊
庇雲宇之多所願執鞭正切生平之慕乃獲為御得陪
執事之先胸中之梗槩欲陳紙上之繁蕪難寫以分言
之則雲泥勢隔以道論之則草木味同惟大賢之有容
庶小夫之自信已蒙躡履不特設烏大夫之羅雖乏運
籌尚冀金蘭相如之譬其為倚嚮罔既編摩

回丘提刑

方秋崖

某昨以行告宜若禮然乃勤界玉之題遠致兼金之贖


可以予可以無予此奚為司府之頒謀之臧謀之不臧
或正坐浮家之誚噬臍何及拜手惟慚蓋以卻則不恭
夫豈受之而是泛剡曲夜深之雪已借一帆溯江東日
暮之雲莫殫萬緒踈趨輦轂肅粧絨滕

回黃提刑

方秋崖

歌赤壁賦曾識史君之不凡移碧玉環寧知老子之可
笑要是荊州牧之賜使為鄭公鄉而來恭惟星辰光寒
風月灑落未了竹樓之記事來桂管之春乃節乃麾倦

游屢矣某丘某水燕處昭然雖寧作赤城之老仙恐未
容綠野之閑處落落難合公亦坐惡圓耶飄飄不羣是
豈能乞巧者天且定矣帝於念哉某一生草茅百事土
苴昔者同韓非之傳戾契謂何今又避庾公之塵牽率
至此顧不能刺刺作婢子語夫然故時時觸權貴人吐
哉是行豈其得已治齊舍蓋幸清淨之可師以柳易劉想
荒餘之已甚



翰苑新書續集卷十三